

Wozjewjenja na Bołmončce, (14.04.2019)

1. Zběrka džensa je postajena za křesćanow w Swjatym kraju.
2. Zašću njedźelu bě zběrka za pomocny skutk "MISEREOR". Wěriwi našeje wosady darichu 1738,00 €. Wutrobne zapłać Bóh tón Knjez wšitkim darićelam.
3. Nětko po kemšach přeprašamy wšitke družki na faru, zo bychmy sej zhromadnje lětni plan nastajili.
4. W 14.00 hodź. je nyšpor z póstnym předowanjom, kiž dźerži knjez farar dr. Daniel Dzikiewicz.
5. Wšitcy młodostni su džensa w 14.00 hodź. na křižowy puć do Radworja přeprašeni. Započatk je w 14 hodź. w farskej cyrkwi.
6. Jutře, pónđzelu je wulke rjedzenje cyrkwyje do Jutrow w Zdźěri. K tomu prosymy wšě žony, kiž maja čas, wo jich pomoc a podpěru, zo by so džěło na wjacore ramjenja rozdźěliło. Spočatk je we 8.00 hodź.
7. Přenjowoprawjenska wučba w němskej rěči je prawidłownje, přenjowoprawjenska wučba w serbskej rěči tutym tydženju njeje.
8. Přiležnosć k swjatej spowědži w tutym tydženju je :

njedźelu	na nyšporje	(farar D. Dzikiewicz)
pónđzelu	wot 18.00 - 18.55 hodź.	(farar Jakubaš)
wutoru	w Zdźěri po kemšach	(farar Jakubaš)
wutoru	wot 18.00 - 18.55 hodź.	(farar Jakubaš)
srjedu	wot 07.00 - 07.25 hodź.	(farar Jakubaš)
srjedu	wot 18.00 - 19.00 hodź.	(Pfr. S. Foelz a Pfr. M. Kleiner)
srjedu	w Zdźěri wot 18.00 – 19.00 hodź.	(Pfr. B. Dittrich)

Plan swjatych spowědžow do jutrow je wupowěsnjeny a w interneće wozjewjeny. Džěći njech tež zhromadnje ze staršimi spowědne poskitki do Jutrow wužija.
9. Bože služby w Martrownym a Jutrownym tydženju su we wuwěšku a w interneće.
10. Zwučowanje wšitkich ministrantow za Zeleny štwórtk je srjedu w 17.00 hodź. Zwučowanje za liturgiju Wulkeho pjatka je pjatk w 9.00 hodź. Zwučowanje wšitkich ministrantow za Jutrownu nóc je sobotu w 9.00 hodź. Zwučowanske časy steja tež na ministrantskim planje. Prosymy wo dypkownosć wšitkich ministrantow.
11. Ministranća klepotaja zhromadnje z přenjowoprawjenskiimi džěćimi Wulki pjatk a Čichu sobotu w 6 hodź., 12 hodź. a 18 hodź.
12. Zeleny štwórtk započina so **Swjate jutrowne tři dny - Sacrum Tridum Paschale** - k wopomnjenju ćerpjenja, wumrěća a zrowastanjenja našeho Knjeza Jězusa Chrystusa. Tute tři dny su wjeršk cyrkwinskeho lěta, z kotrehož so wužórła radosć jutrowneho dobyća. Swjatočna Boža mša k wopomnjeću poslednjeje wječerje je štwórtk w 20.00 hodź. Po Božej mši česćujemy Najswjećiše hač do 24.00 hodź. Młodostni du po kemšach křižowy puć po wsy. Prosymy wo Waše bohate wobdźělenje.
13. Wulki pjatk je přikazany kruty póstny a abstinenty dzeń. Nasyćimy so, spominajo na Chrystusowe ćerpjenje a wumrěće, jenož jónu wob dzeń a zdźeržamy so mjasnych jědžow a wšeho, štož njeje za zežiwjenje trjeba na přikład alkohola a podobneho. Nimo jónkrótneho nasyćenja, je na póstnym dnju, dwoje małe posyljenje dowolene. Zawjazani k

posćenju su wšitcy dorosćeni wot 18. do 60. žiwjenjskeho lěta, jeli chorosć jim to njezadźěła. To płaći tež za našich křižerjow w konjencach. Popołodnju w 15.00 hodź. je liturgiske wopomnjeće ćerpjenja a wumrěća Chrystusoweho. Prosimy wo to, zo by so cyła wosada na tym wobdźěliła. W Zdźěri modlimy so rano w 8.00 hodź. křižowy puć a wječor je w 19.00 hodź. nyšpor.

14. Swjata sobota - to njeje jutrowna sobota - njech je wšitkim džeń dočakanja na sławne dobyće Jězusa. Prosimy wšitkich wěriwych a wosebje tež staršich z dźěćimi do cyrkwyje přińdź, Boži row wopytać a so pomodlić. Přiležnosć Boži row wopytać je pjatk po liturgiji hač do 19.00 hodź. a sobotu wot 6.00 hodź. hač do 16.00 hodź. Tak, kaž kóždy wjesnjan zemrětemu ze wsy na pusty wječor dže, tak měł kóždy wosadny přińdź k Božemu rowej a so modlić Bolosćiwy różowc, wopominajo Jězusowy zestup do předhele. Swjata sobota je hišće póstny čas.
15. Zběrka do wopornički při Božim rowje je za ponowjenje lampy w Křižnej cyrkwi.
16. Na Jutrownu nóc njech sej prošu kóždy jutrownu swěčku sobu přinjese. Swěčki předawaja so Zeleny štwórtk do kemši a Wulki pjatk po liturgiji w předhali cyrkwyje. W Zdźěri móžeće je hižo nětkle w kapali dóstać.
17. Swjedźenske wopomnjenje Jězusoweho dobyća nad smjerću - Swjata jutrowna nóc je w 20.00 hodź. Je to najwažniša Boža mša cyłeho lěta. Wona započina so ze swjećenjom jutrowneho wohenja a jutrowneje swěčki před Božim domom. Po kemšach je procesijón po wsy na kěrchow a wróco do farskeje cyrkwyje. Prosimy, zo bychu so wšitcy na procesijónje hač do kónca wobdźělili a z Božim žohnowanjom domoj šli. Radworčanow prosimy zaso swoje domy ze swěčkami wupyšić a wobswětlić. Za procesijón přinjeseće sej prošu lampki sobu. Za jutrownu nóc přinjeseće sebi prošu wosadnik a Gotteslob sobu. Štóž chce jutrownu wodu swjećenju měć, njech prošu z časom sudobjo přědku wotstaji.
18. Po wašnju našich wótcow pojěchaja naši křižerjo tež lětsa zaso, zo bychu w jutrownej radosći poselstwo wo Chrystusowym zmortwychstanjenju wozjewjeli. Křižerjo, kotřiž njejsu so hišće do wjesnych lisćinow zapisali, njech to prošu džensa nachwataja. Lisćiny jenož hišće džensa wuleža. Nowačkojo poslednich třoch lět, zetkaja so džensa po kemšach na farje k rozmołwje a k zwučowanju z kantorom. Prosimy tež wšitkich křižerjow so nutřkownje přihotować, k swjatej spowědži hić a liturgiju Swjatyh jutrownych třoch dnjow sobu swječić. Prosimy wšitkich, jutrowne poselstwo na dostojne wašnje wozjewjeć. Radworski procesijón zhromadzi so Jutrowničku wot 11.30 hodź. na nawsy. Wottam podadža so po droze Józefa Nowaka k wosadnej cyrkwi, kotruž trójce wobjěchaja, prjed hač so po zwučenym puću do Baćona podadža.
19. **Porjad lětušeho procesijóna po hłowje:**
Čorny Hodler a Chasow, Radwor, Bronjo, Kamjenej, Měrkow, Boranecy, Chelno,
20. **Jubilarojo a nowački lětušeho procesijóna su:**
50. raz: Dr. Hantuš, Alojs z Budyšina a Kral, Pětr z Chelna
25. raz: Štrus, Jurij z Radworja; Bauch, Alexander z Boranec; Bauch, Chrystof z Boranec, Grofa, Michał z Chasowa; Delan, Měrcin z Budyšina a Nawka, Cornelius z Wulkeje Dubrawy
1. raz: Buša, Klemens z Radworja; Mička, Adrian z Bronja a Měškank, Matej z Lipska
21. Zašlu pónđzelu bě chowanje za + Marju Rychtarjowu z Delneje Hórki. Za nju spěwamy džensa na Božej mši w 7.00 hodź. ,w Zdźěri,kěrluš. **R.i.p.**
22. Zašlu srjedu bě chowanje a rekwiem za + Hilžu Šeferowu z Radworja. Za nju spěwamy džensa na serbskej Božej mši w 8.30 hodź. kěrluš. **R.i.p.**